

# SAN PEDRO KARTA NYAFXTE FXI'JNI

---

Vxite kiwesu u'p-ya' u'jsatx Pedro fxi'jni

**1** <sup>1</sup>Adxa' Jesukristo jxkaahnisa Pedro yaaseth. Naa karta's fxi'jaçthu vxite kiwesu u'p-ya' u'jsawe'sxtxi, Ponto, Galacia, Kapadocia, Asia, Bitinia txää kiwesuve'sxtxi. <sup>2</sup>I'kwe'sxtxi txhitxwa'ja's Dxus kwe'sx Tata' nyafxiitey ma'wëne' pheu'jçxa ji'phu' txä'sa' kxtey yuuk. Txääsak Dxus Espiritu' i'kwe'sxtxi ewmeejü txuhdeçxa Jesukristo eeju nuyaate Jesukristoçxá's nwëese'lhan. Txä'wë Dxus pu'çxpa'ga äçxha' seena' wala wët mfxi'zewe.

**Na'wësa's jxpa'gaya' üythasna fxi'zeni**

<sup>3</sup>Äçxha' kwe'sxtxi jxpe'jsa Jesukristo Tata's weçxana tuuthe'ljega. Txä' kwe'sx ewmeesatewa peeygähçxa ki' u'se upksa na'wë yuuwa'ja's vxitku, nawa Jesukristo kwe'sx pa'gate uuçxa ki' itxi yuupa'gaçxáak txä'wë yüu. <sup>4</sup>Txää pa'gak ew jii ya'fxi'ze', Dxusa' cielute kwe'sxtxi üswa'j jxaawni ji'pha' txä'sa' jxpa'ga'nja'w sühna üythasna. Txä' bagaçxte yuhwa pçumeena sa' suweewameena sa' vxituwameena. <sup>5</sup>I'kwe'sxa' Dxusa's üuste jxpubamée yaakxwa'ja's ji'phi'kwe, naa pa'ga txä' i'kwe'sxtxi jxaawuuna nmeh en ähte i'kwe'sx cielute pa'jwa'ja's pheu'jçxa ji'pha' txä'sa' jxpa'gakahn.

<sup>6</sup>Txää pa'ga i'kwe'sxa' iiméh wala weçxana meswe, makwe maa enteya' nxuswa'j en ma'wësawa pa'thewa. <sup>7</sup>Txää pa'gatey nxuswa'j en thëysa pa'ja'tx txä' Dxusa's jxpubamée jwee íçxáa çxhäçxha yaakxwa'ja's pheu'jsata', vxyuu beja'swa ew zhiçxkwe neeyüukahn ma'wëga ipxte kabçxa ya'pheu'ju' txä'wëy. Aça' makwe thëysa nxuswa'j en pa'thewa Dxusa's jxpubamée yaakxni's ivxiitusame' vxyuu beh pçusaate jxthaakwe pa'gasa yuuna. Txä'wë yüusa' isa weçxana jxtuhthesa yuune'kwe naa kiwete Jesukristo kii ente!. <sup>8</sup>I'kwe'sx yafxju yu' Jesukristo's uymeeçxawa, peeygähçxa nwëese'je'i'kwe, sa' uymeeçxawa txä'sna yajkxçxa iiméh seena' wala üuste weçxweçxa yaaki'i'kwe. Txä'wë üuste iiméh seena'

wala zhiçxkwe wētwēt yaakxni's pta'sxya' ya'âja'çme!. 9 I'kwe'sxa' txā'wē Dxusa's jxpubamée yaakxwa'ja's ji'phupa'ga i'kwe'sx ūusa' ewte neeyūuna.

10 Dxus peeygāhçxa i'kwe'sxtxi ewte nvxiitwa'ja's jiyuçxa pta'sxsa nyafxii enteywe'sxa' wala paapējxna atxahtx ewte neeyūuwa'l jīni's.  
 11 Txā'wē Dxus Espiritu' txāawe'sxtxi' dxiikhēy kaajiyu'kh ewte nvxiitwa'jsa' wala pxthaax yuuçxawa txāa e'su' wala jxtuhthesax yuuwa'jsa' jīna. Txāa pa'gatx Dxusna selpisaawe'sxa' jiyu wēe txā'wē yuuwa'jsa' kimki sa' bagaçxki açki'k Dxus Espiritu' txā'wē pta'sxi' sūhna. 12 Txā'wē paapējxna ūste', Dxusa' txāawe'sxtxi pejka kaajiyu'kh txā'wē pta'sxnisa' i'kwe'sx jīi meeaa', vxite ensuwe'sx jīia' jīk. Txā'wē ewte neeyūuwa'l seena' wētwēt-sa's Dxus ūsku txā'sa' angeleswe'sx yuhwa jweefiçxáa wala jiyuwaça' sūju'tx, txā'wē seena' zhiçxkwsa pa'ga.

### Kīh pkal yuhwa ji'phmée fxi'zekahnku Dxusa' pa'ya

13 Txāa pa'ga ew miiyajkxwe ma'wē ew fxi'zewa'ja'swa wala jxpa'yakx. Dxusa' i'kwe'sxtxi peeygāhçxa Jesukristo vxyaa ente' ūsy'a'wa' txā'sçxáana üythasna meswe. 14 Nwēese'jsa luuçx na'wē myuuwe. Nyafxiia' Dxusa's jiimeecxa' ma'wēkwe peekx ūus yaakxni ewmeesateçxáa fxi'ze' txā'wē yūunuwe, 15 wejxwa ūusuh jxuka ewmeejū txuteeçxa ūuste kīh pkal yuhwa ji'phmée mfxi'zewe, txāa pa'gatey i'kwe'sxtxi pa'yasa Dxuswa kīh pkal yuhwa ji'phmeesa' naa pa'ga. 16 Txajíik Dxus librute na'wē we'we': I'kwe'sxa' kīh pkal yuhwa ji'phmeesa myuuwe, adxwa kīh pkal yuhwa ji'phmeesath naa pa'ga jī'k.

17 Miiyajkxwe Dxusa' kwe'sx Tata' jīna kxsusu'i'kwe txā' kim yuhtxwa nvxihtmée jxuka pēywa'jsate jīiçxa', ūukhna mfxi'zewe naa kiwete makwe txaçx ītxi fxi'ze'ççxawa. 18 Yaçgawé'sx ma'wē ewmée fxi'zete', i'kwe'sxwa txā'wēy ewmée fxi'zenijū Dxusa' nwe'wek. Sa' i'kwe'sxa' ew jīi i'kwe txā'wē nwe'wepa'ga kīh yuhwa ya'dukhme' naa kiwete pçuwa'jsa ūsta' vxyuu beh vxyuu çxihme txā'wēsa yakhçxáa yuhwa. 19 Naasáa Jesukristo ee yakh yuuçxáak dukhnisa yuu. Txā' piisxakuē kīhte yuhwa aça'meesa ewsa's ikhçxa pkalxti yaateya' kabinisa na'wēk yuu. 20 Kristo' txā'wē yuuwa'kh txhitxhnisa yuu naa kiwe meetey, nawa naa ensuçxáak txā'wē yuuwa' vxyaa i'kwe'sxtxi nwe'weyä!. 21 Kristo txā'wē yūupa'ga i'kwe Dxusa's jiyuya' âja. Dxus fík Kristo uutewa ītxi vxitçxa tuhthe nvxiht, Dxus yuuçxáana yajkxna üythasna fxi'zekahn.

22 Açxha! i'kwe'sxa' Dxus Espiritu pu'çxte!, isa pta'sxni's wēse'jçxa', i'kwe'sx ūustxi yaate i'kwe ūusuh jxuka yajkxçxa yakhthē'jwe'sxtxi peeygājxa!. Txā'wē yāl'jçxa', puutx teeçxsa na'wēçxah ya'mpeeygāhwe ūusuh jxuka yajkxna. 23 Txāa pa'gatey i'kwe'sxa' nasa naa kiwete pkalsa ji'jmée, kīh pkal yuhwa ji'phmeesa ji'ji'kwe yuu. Dxus yuwe bagaçxte yuhwa pçuwa'jsame!' wēse'jçxa i'kwe txā'wē yuu. Dxus yuwe' bagaçxte yuhwa pçuwa'jsame!. 24 Txajíik Dxus librū' na'wē pta'sxi':

Naa kiwete nasa' jxukaysa skhēwwa'jsaçxáata'.

Txāawe'sxa' makwe seena' wala jiisaçxawa, jxūth tasx na'wēsaçxáata'.

Jxūthwa uhdxté!, kitewa wete'k txā'wēysaçxáata'.

<sup>25</sup> Nawa Dxus yuwe' bagaçxte yuhwa pçumée nes yuuwa'jsa' jī'k.

Txāa Dxus yuwe's iik i'kwe'sxtxi pta'sxni yuu.

**2** <sup>1</sup>Txāa pa'ga ewmée yūuya' yaakxnii's jxuka manvxihtwe. Íksiinisa, yuwejuçxáa ew we'weçxa' ūuste yu' ewmée yaakxnii, vxitetx açeyaakxnii, e'sgaçxáa ewmée nuywe'weni txā'wēsatxi' nvxihtçxa, <sup>2</sup>luuçx u'se kasehsawa ma'wēga leçxi ewsäçxá's jxpa'ga', txā'wēy i'kwe'sx ūuste ew kçxhāçxha'jwajsaçxá's mpaakwewe. Txā'wē yūuçxa Dxus yakh çxhāçxha fxi'zene'kwe ewte neeyūuya!. <sup>3</sup>Txā'wē myūuve, kwe'sxtxi jxpe'jsa ewsatewa ew jiyu dxihçxa'.

### Kwet ïtxisa na'wēsa' Kristo'

<sup>4</sup>Kwe'sxtxi jxpe'jsa tasxte mutxaawe. Txā' kwet ïtxisa na'wēsa!. Txā'sa' naa kiwete nasa' ahçetx, nawa txāaík kwet jxthaakwe ewsa Dxus txhitxhnisa yu!. <sup>5</sup>I'kwe'sxwa kwet ïtxisa na'wē i'kwe naa pa'ga Dxusa' i'kwe'sxtxi' txajx ūswa'j yat na'wēsak vxitu', sa' txā'wēçxáamée kih pkal yuhwa ji'phmée txajx tasxte yuuçxáa selpiina ūswa'jsak vxit, txāa pa'ga txajx tasxte utxaaaçxa ewsa yuuçxá's kxtey myuuwe. Jesukristo pu'çxte', i'kwe'sx txā'wē yūuni's Dxusa' jxpa'gana. <sup>6</sup>Txā'sna we'weçxak Dxus librute na'jí':

Yat txaahwa'j kwet txhitxhnisa iiméh ewsa nvxiituchi Sion judiuwe'sx kiwete,

Aça' txā'sa' maawa jxpa'gasa' jxpubasáa yuumenea jī'k.

<sup>7</sup>I'kwe'sx ew jiyusa yakh yu' txāa kweta' iiméh wala ewsa'. Nawa jiyusamée yakha' na'wēçxáak ya'yu' txā'wē yūuni's Dxus librute na'wēk we'we':

Yat txaahsawe'sxa' kweta's ahçeçxa wāatähiewa,

E'suyā'ja' txāaík thaakwe ewsa yuuna pa'l jī'k.

<sup>8</sup>Vxite ajkhē' txāa kweta'sii we'weçxa':

Kweta' kxu'çxafxi'jçxa pëtxsaçxá' jī'k.

Dxus yuwe's pta'sxtewa, txāawe'sxa' kxtey nwēese'jsame' jxpubasaata', jiyuwa'jsamée ne'ta yu' naa pa'ga.

### Nasa Dxus txhitxhnisa

<sup>9</sup>Nawa i'kwe'sxa' Dxus txhitxhnisai'kwe, txajx tasxte yuuçxáa selpiina ūswa'jsa. Dxus kusetewe'sxi'kwe, kih pkal yuhwa ji'phmeesa. Txāa pa'ga Dxus txakwe wala i'kwe'sxtxi ewte nvxiitni's pta'sxwa'j ji'phi'kwe. Txā'wē yūukahnku pa'ya, jiimée jxpubana çxhi'dxte ūsnijū kasehçxa zhiçxkwé eenate pa'khan. <sup>10</sup>I'kwe'sxa' nyafxiia' Dxus jii yu'çmée i'kwe, nawa

ãçxha' Dxus jii i'kwe. Nyafxíia' kim yuhwa peeygāanisamée i'kwe yu', nawa ãçxha' Dxus peeygāanisa i'kwe.

### Dxusna selpiina yuuçxáa mfxi'zewe

<sup>11</sup> Adx yakhté'jwe'sxtith neewe'we': I'kwe'sxa' naa kiwetewe'sxmée yâ'ji'kwe, txää pa'ga peekx kakwe ewmée yüuya' yaakxnitxi's nwéese'jnuwe. Txä'wëme' üusa's suwsaata'. <sup>12</sup> Dxusa's jiimeesawe'sx ksavxysu wala ew mfxi'zewe. Txäawel'sxa' ãçxhií yu' wala açewe'we'tx i'kwe'sxtxi ewmeesa na'wë. Nawa Kristo kii ente! i'kwe'sx ew yüuni's uyçxa', Dxus luuçx yuh yu'ta jïna tuuthe'jetxna.

<sup>13</sup> Dxusa's jii yâ'jsa' jxuka mwéese'jwe naa kiwete jxkaahwa'jsa nvxiitni üsta' txäawel'sxtxi, jxkaahsa npiiçthé'jsa ma'k yuu, <sup>14</sup> meeçxa' jxkaahsa nuuçxsa ma'tx yuu nawa jxuka. Txäawel'sxa' Dxus kaahnisata' ewmée yüusatxi' kastigäyna vxite' ew yüusatxi' nwe'wesa. <sup>15</sup> Txää pa'gatey Dxusa' i'kwe'sxtxi' ewku yüu jxthääsu' vxitetx, txä'wë yüuçxa açewe'wesatx sxuuna' vxit-ya'!

<sup>16</sup> Dxus nwe'wenisa yâ'jçxa', ew mfxi'zewe. Nawa nwe'wenisa yâ'tha'w aça' kimwa ma'jimeena sühçxa ewmée yüunuwe, wejxwa Dxus kusete selpisaatha'w sühna ew yüuwa'jçxá's yajkxna mfxi'zewe. <sup>17</sup> Jxukaysa yakh ewçxáa mfxi'zewe, yakhté'jwe'sxtxi peeygähna, jxkaahsawe'sxtxi nwéese'jna, Dxusnawa txä'wëy nwéese'jna.

### Kristowa ma'wëga pkxuuni yuu txä'wëy myuuwe

<sup>18</sup> Selpisaawe'sxa' i'kwe'sx patrontxi wala jxpa'yakx nwéese'jna kxtey myuuwe. I'kwe'sx patron ewsaçxáatx txä'wë yüumée, patron seena' juuna'satxwa ewçxáa myüuwe. <sup>19</sup> Kihwa ähmée yüumeete Dxus yakh fxi'zepa'gaçxáa patronwe'sx txä'wë kastigäyte!, txä'sa' nxuswa'jme!. <sup>20</sup> Nawa i'kwe'sx ähmée yüute kastigäyte!, yuuwesatha'w naa pa'gatx kastigäy sühwa'jçxá!. Nawa i'kwe'sx ew yüupa'gaçxáa nxuswa'j ena's ji'phute', Dxusa' peeygävana. <sup>21</sup> Txä'wëte fxi'zekahnku Dxusa' pa'ya, i'kwe'sx pa'gate Kristo' yuuwemeesaçxawa pxthaa yuuk txää na'wëy yuuwemeesaçxawa pkxuuni yuukahn. <sup>22</sup> Txä' kih pkal yuhwa yüume!, sa' kim yuhnawa îsxime!. <sup>23</sup> Wéesxusatxi's ka'tuwa wéesxuuna pasme!. Pkxuusaatxi's txä'wë yüupa'ga i'kwe'sxwa ewmeete neeyüune'kwe jïna pasme!. Txä'wë yüumée wejxwa Dxusçxáanak neewe'we. <sup>24</sup> Kwe'sx pkaltxi's Kristok kluuste uuçxa ivxiitu, kwe'sxa' peena' yu' pkalte fxi'zemée Dxus dxi'pte ewçxáa fxi'zekahnku txä'wë yüu. Kwe'sx pkala' yaateni yuukahnku txä' pkxuuni pxthaa yuu. <sup>25</sup> I'kwe'sxa' nyafxiia' piixxáa vxitura na'wë i'kwe üsu', nawa ãçxha' Kristo tasxte sxawedi'kwe, txä' piixxáa thegsa na'wëk jxpe'je' i'kwe'sx üustxi.

### Ptamsa' na'wë fxi'zewa'ja'

**3** <sup>1</sup> U'ywe'sx iimi'i'sawa, i'kwe'sx nmi'tx kxtey nwéese'jna mfxi'zewe. Txä'wë yüute', i'kwe'sx nmi' maaíia' Dxus yuwe's wëse'jya' wa'l'sawa

<sup>2</sup> i'kwe'sx ew fxi'zeni's uyçxa', Dxusa's jiyuna pa'jatxna, Dxusa's mpaakwe jīna we'wemeetewa. <sup>3</sup> I'kwe'sxa' peekx kakwe āakhēwe'sxçxá's txakwe wala zhiçkwesa ki'pna pheu'jwa'j ji'phmée i'kwe, <sup>4</sup> wejxwa ūuste txã'wē zhiçkwewe mpheu'jwe, ew yūuwa'lçxá's yajkxna, vxitesa yakh puiimée fxi'zewa'ja'sçxáa pakwena. Txãaçxáa thaakwe ewsa' Dxus dxi'pte.

<sup>5</sup> Nyafxí entey u'ywe'sxa' txãawe'sx ūustetx txã'wē zhiçkwewe pheu'ju' Dxusçxáana neewe'wena txãawe'sx nmi'tx nwēese'ljna. <sup>6</sup> Sara' txã'wēsak yu'. Abrahana's ū'kwe's jxpe'jsa' jīnak nwēese'je', aça' i'kwe'sxwa txãa na'wēysa yuune'kwe, txã'wēy ew nwēese'lçxáa yu', āhmeeth yūu sūhna ūukh yajkxna fxi'zemeene'e'kwe.

<sup>7</sup> Txã'wēy nmi'we'sxwa i'kwe'sx nyuu yakh jxpa'yakx ewçxáa mfxi'zewe, u'ya' wejxkuē' çxhāçxhameekweta' txãa pa'ga. Sa' txã'wēçxáamée, i'kwe'sx na'wēyçxáa Dxus yakh fxi'zesata' txãa pa'ga txã'wē ew mfxi'zewe, Dxus yakh puutx we'weni' kxul yuukahmen.

### Ew yūupa'ga nxus knaysáa

<sup>8</sup> Jxukaysa i'kwe'sxa' ewçxáa yūuna mfxi'zewe, vxitesatxwa teeçxsa na'wēçxah peeygāhna. Weeçx yajkxmée zhiçkwewe puutx we'wena yakhthē'j pwe'sx na'wē mfxi'zewe. <sup>9</sup> Ewmée yūusa's ka'tuwa txã'wēy ewmée yūuwa'jme', sa' wēesxute', txã'wēy ka'tuwa wēesxuwa'jme', wejxwa txã'wē yūusatxi' ka'tu yu' ewçxáa myūuwe. Txã'wē ewçxáa yūukahn íicxáak Dxusa' i'kwe'sxtxi pa'yaçxa txakwe wala ew yūu.

<sup>10</sup> Txã'wē yūuwa'ja's na'wēk pta'sxi' Dxus librute:

Maawa ewçxáa wēt fxi'ze wēeçxa',  
Peekx thune's ewmée we'wekahmen jxpa'yakxçxa  
I'kwe'sx yuweju ūxiinuwe.

<sup>11</sup> Ewmeejū txutheeçxa, ewçxáa yūuna  
Puiimée fxi'zewa'lçxá's pakweçxa uu entepkaçx txã'wē yuuçxáa  
fxi'zewa'ja'!

<sup>12</sup> Txãa pa'gatey Dxusa' jxpe'je'k ew yūusatxi',  
Sa' Dxusa's pakwen neewe'weni's wēse'je'k.  
Nawa ewmée yūusatxi' txã'wē yū'çme' ji'k.

<sup>13</sup> Bagaçxtewa i'kwe'sxa' ewçxáa yūuçte', ñkim txã'wē ka'tu' ewmée yūukx?  
<sup>14</sup> Ew yūuna fxi'zepa'ga nxuswa'j en ji'phuçxawa, weçxana wētwēçxáa meswe. Kim yuhtxwa ūukhnuwe kuh yajkxna, <sup>15</sup> wejxwa i'kwe'sx ūuste jxkaahsa Kristoçxá's weçxana mneewe'wewe. Na'wē i'kwe'sxtxi kaapiya'jni's jii i'kwe txã'sna paapēysatxi's pasya' thaamemée meswe bagaçxtewa, sa' ūusçxa we'wemée ewçxáa mpaaswe. <sup>16</sup> Txã'wē ew yūuçxa mfxi'zewe, i'kwe'sx ūuste yuuwemeetha'w sūhwa'lçxáa ūusuthekahn, kxah Kristo yakh ew fxi'zesatx e'sga ewmée nuywe'wesawe'sxa' thaameetxna, txã'wē i'kwe'sxtxi ewmée nuywe'weçxa'. <sup>17</sup> Wejxwa ewmée yūuçxa nxus knayupkaçxte, ew yūupa'ga nxus knayni wejx ewa', Dxus yuu txã'wē jxthāas yā'ithe'!

<sup>18</sup> Kristowa txā'wēyku pxthaa yuuçxa uu, tee dxi'jçxáa jxukaysa pa'gate. Txā' ewsak yu', nawa kwe'sx ewmeesa pa'gate pxthaa yuuk Dxus taszte nuypa'jya!. Txā' isa uuyujk kakwe yu', nawa ūus yu' uume!. <sup>19</sup> Txāasak u'j uusaawe'sx ūus preesu ūsu'tx kxtsee pta'sxya!. <sup>20</sup> Txāawe'sxa' nyafxii Noé ente' nwēese'jsameetx yu' Dxusa's. Txāa ente' Noea' barko's pheu'ju'çpkaçxha!, Dxusa' wala yuh ūythasku txāawe'sxtxi' nwe'weya!. Nawa oçxo nasaçxáatx yu'ju nwe'wenisa yuu. <sup>21</sup> Noé ente yu'a' äçxh yu'te ya'bautisa'i tha'w ewmeejū jxukate txuteeya' sühçxa txā'wēsak yu'. Nawa bautismo' pkala's yaate'çme', naasáa Dxus dxi'pte peena yu' pkalte fxi'zeya'mée sühçxaçxáak ya'bautisaynisa yu!. Aça' Jesukristo uuçxa ki' ītxi yuunisa yuuçxáak kwe'sxtxi' nwe'we. <sup>22</sup> Äçxha' txā' cielun u'jçxa Dxus pukate jxkaahna ūsa!, aça' txā'sa' angeleswe'sx ma'wēsawa txā'sçxaçxáanatx nwēese'je!.

### Selpiiya' äjawa'ja's Dxus ma'wē ūste' kxtey yuuwa'ja'

**4** <sup>1-2</sup> Kristowa ma'wēga txajx kakwete akasa's jxpa'gana pxthaa yuu, txā'wēy i'kwe'sxwa pxthaa yuuwa'jsatha'w sühna meswe, txāa pa'gatey peekx kakwete ewmée yūuya' yaakxni pkala's nvxihtçxa, Dxus jxthāasniçxá's uu entepkaçx kxtey yuuya' yaakxpa'gak pxthaa yuuwa'l en pa'ja!. <sup>3</sup> Pkala's nwēese'jmée nvxiht-ya'íi nyafxii entey wala yāl'jne'kwe nwēese'j Dxusa's jiimeesawe'sx yakh ja'daçxah. Txāa ensu' i'kwe'sxa' ewmée i'kwe yūuna fxi'ze peekx kakweju ewmée yūuya' yajkxna, tūuna, ku'jna, pkhaakheçxa tudxna, Dxus ītximeesatx neewe'wena. <sup>4</sup> Txā'wē yūusai'kwe yu!. Nawa äçxha' i'kwe'sxa' peena yu' txāawe'sx yakh txā'wē iiméh seena' ewmée yūuna fxi'ze'çmeene'kwe, txāa pa'ga ne'ta i'kwe'sxtxi' ewmée nuywe'wena açe!. <sup>5</sup> Nawa txāawe'sxa' Dxusna paswa'j ji'phutxna, ītxisa ma'tx yuu meeçxa uuniisa ma'tx yuu nawa jxukaysatx paapēywa'l ente!. <sup>6</sup> Uusaawe'sx ma'tx yuu nawa paapēy ente' kakwe ji'phsa na'wēyçxáa paapēyni yuutxna. Aça' uute' ūus yu' Dxus na'wēyçxáa ītxi ūskahnku txā'wē pta'sxni yuu. Txā'wē yuuwa'jsate iiçxáak uusaawe'sxtxiwa Dxus yuwe's pta'sxni yuu txāawe'sx uumeyna.

<sup>7</sup> Naa kiwe pçuwa'j ena' utxaaaça!. Txāa pa'ga i'kwe'sxa' wala jxpa'yakx meswe, naasáa Dxus yakh yuuçxáa puutx we'wena mfxi'zewe. <sup>8</sup> Nawa i'kwe'sx pwe'sx puutx peeygāawa'ja's wejx jxthaakwe mpa'pçxuwe, txāa pa'gatey peeygāanisa' pkal makwesanawa jxuka kaapeltunai'kh jī'k. <sup>9</sup> Yakhthē'jwe'sxtxi yat mpeeki'jwe wa'lmée. <sup>10</sup> Teeçxsa na'wēçxah puutx ya'mpu'çxwe, i'kwe'sx selpiiya' äjawa'ja's Dxus ma'wēne' ūs txā'sa' kxtey yuuna. Dxusa's selpiwa'ja's nakwe wala kuh jwed ūsni yuuk txā'sa' jxpa'gaçxa!, ew kaaselpi'jsa myuuwe. <sup>11</sup> Maañia' pta'sxwa'j ji'phçxa', peekx ūuste yaakxni's we'wemée Dxus we'weniçxá's pta'sxwa'ja!. Maawa vxitex pu'çxya' yaakiççxa!, Dxus makwe kçxhāçxha'jana txā's yu' jxuka kxtey yuua'ja!. Kih yūuççxawa Dxusa's weçxaawa'ja'sçxáa yajkxna txā'wē

yūuwa'ja' Jesukristo's pi'kxçxa, txāa pa'gatey kījkīhwa jxuka Dxus jīiçxaçxáata' bagaçxtewa nes yuuwa'jsa.

### Nxuswa'j en pa'the weçxana fxi'zewa'ja'

<sup>12</sup> Yakhthē'jwe'sx, Kristo's nwēese'pha'ga nxuswa'j en pa'the', fxiy yuh yu'k sūhna kuh yaakxnuwe, <sup>13</sup> wejxwa Kristo na'wēy nxuswa'ja's ji'lphuçthu sūhna wēt miyajkxwe. Txā'wē yūuçxa', txajx kīi ente' weçxaawa'ja's wala uyuune'kwe. <sup>14</sup> Kristo yakh fxi'zepa'ga ahçena wēesxute', i'kwe'sxa' nxusmée mweeçxawe, txāa pa'gatey Dxus Espiritu' i'kwe'sx ūuste ūsa' nxusmée weçxweçxa kaayaki'jwa'jsa. Kristo' txāawe'sx yaaçenik fxi'ze', nawa i'kwe'sx yu' txā'sa' weçxana i'kwe fxi'ze'. <sup>15</sup> I'kwe'sxa' maa yuhwa nxus knaywa'j ji'lphuwa'j ji'phmée i'kwe, na'wē yūuçxa: nasa ikhna, pesweena, ewmée yūuna, īxiina yuwe ksuusu'jna fxi'zena. Txā'wē yūuçxa nxus knaywa'j yu'sa' ji'phunuwe, wala thaampa'sa!. <sup>16</sup> Nawa Kristo's selpiipa'ga nxuswa'j en ji'lphuçxa', thaamewa'jme', wejxwa Dxusa's weçxana tuuthe'jwa'ja!. <sup>17</sup> Txā'wēme', makwe Dxus luuçte yuhwa nxuswa'j ena' txāawe'sx yakh khuē'yku takh na' âçxh nmeh ente' ñma'wē seena' thaakwe nxus yujkx Dxus yuwe's nwēese'jsamée yakha? <sup>18</sup> Dxus luuçx yuhwa wala nxus knayçxa nwe'weni yuute', pkalsa ewmeesa yu' ñmtee yuuya' u'jwetxki? <sup>19</sup> Txā'wē Dxus jxthāasnite nxuswa'j en ji'lphuçxa', nxusmée fxi'zewa'ja' peekx ūustxi Dxus kusete neewe'wena. Txāak kwe'sxtxi taki'j na' txāaíçxáa nwe'wena.

### Dxus yakh fxi'zesatx yu'kxpehni

**5** <sup>1</sup>Ancianowe'sxtxi yu'kxpejeçthu, adxwa txāawe'sx na'wēysa ūçxáath, sa' Kristo pxthaa yuuni'swa uysaath, sa' txāawe'sx na'wēy cielutewa ūswa'jsath. <sup>2</sup> I'kwe'sx kusete neewe'weni ūsta! Dxus luuçx txāatx jxpa'yakx miipe'jwe, piisxáa-thegsa na'wē. Sa' vxyuu jxpa'gawa'jçxá's yajkxna txā'wē yūumée, Dxus jxthāasniçxá's kxtey myuuwe, wa'lmée weçxana ewçxáa yūuna. <sup>3</sup> Sa' Dxus luuçx i'kwe'sx jxpe'jnitx juuna' we'wenawa jxkaahwa'jme!, kxah i'kwe'sx fxi'zeni's piyaatxna. <sup>4</sup> Txā'wē yūuçxa', kwe'sxtxi jxpe'jsa jxthaakwe jxtuhthesa vxyata'e!, i'kwe'sxa' jxpa'gane'kwe peesni iiméh zhiçxkwesa's txā' naa kiwega peesnisa pçu'tx txā'wēsa meeta!.

<sup>5</sup> Piçtakxwe'sxwa txā'wē ancianowe'sx we'weni's kxtey myuuwe. Jxukaysa puutx ya'nwēese'jna fxi'zewa'ja' iiwejçx yajkxmée. Txā'wēme', Dxusa' pu'çxhi'çme' iiwejçx yaakxsatxi's, nawa iiwejçx yaakxsameetxi's peeygāhnak pu'çxhi'.

<sup>6</sup> Txā'wē yā'the', Dxusa's mwēese'jwe, txajx kuseteçxaçxáa jxuka ya'dukhna, kxah i'kwe'sx txā'wē yūunijū', Dxusa' i'kwe'sxtxi' walasa vxituna. <sup>7</sup> Txāa pa'ga i'kwe'sxtxi kīh thēysa vxyaatewa, txā'sa' jxuka Dxus kuseteçxaçxáa manvxihtwe, txāa pa'gatey txā' i'kwe'sxtxi thegsa' naa pa'ga.

<sup>8</sup> I'kwe'sxa' jxpa'yakx meswe. Txā'wēme!, i'kwe'sxtxi acesa eçxthē'ja' kimçxáanawa ikhya' sūhna león na'wē seena' pebeena pakwena u'ju!. <sup>9</sup> Nawa eçxthē'ja's weh yuhwa nwēese'jnuwe Dxusa's çxhāçxha yajkxna, txāa pa'gatey i'kwe'sxçxáamée txā'wē pxthaa nxusna ūsi'kwe, yakhthē'jwe'sx msuuwe'sxwa jxuka txā'wēçxaçxáa pxthaa yuuna ūsta!. <sup>10</sup> Nawa i'kwe'sx maz en pxthaa yuunijū!, Dxus kīhtewa jxuka pu'çxsa' kçxhāçxha'jana jxpubana sxiigmée ew fxi'zewa'ja's pu'çxna. Txāa Dxusiiçxáak kwe'sxtxi pa'ya, Jesukristo yakh bagaçxte yuhwa pçumée ūswa'the. <sup>11</sup> Txāa pa'ga bagaçxtewa txā's yuuçxáana weçxaaga.

### Yuwe weçxaa kaahnitx pta'sxna fxi'jni

<sup>12</sup> Naa karta's fxi'jçxa kajaçthu ew fxi'zesá yakhthē'j Silwano yakh. Kxtrea' jxu'jmeekweth yu'kxpeje!, na'wē Dxus pu'çxni's jxpa'gai'kwe txā' Dxusa' peeygāasa yuhna sūhwa'ja's ew kaajiyu'jsata!. Aça' txā'wē ūsutheni's peçxkanamée mfxi'zewe.

<sup>13</sup> I'kwe'sx na'wēy Dxus txhitxhnisa Babilonia kiwete ūsta! txāawe'sxwa yuwe weçxaa kaja'tx, aça' adx nçxi'k na'wësa Markoswa yuwe weçxaa kaja'k. <sup>14</sup> Puutx pta'sxna yuwe meen weeçxawe, teeçxsa na'wēçxah ya'peeygāhna.

Jesukristo's nwēese'jsa i'kwe'sx jxukaysa ewçxáa mfxi'zewe.